



TEMANAN PA MISA DI OURORA 2017

Inspirá na e lema di Hubileo di Diócesis: “Enkuentro ku Kristu, enkuentro ku otro”i na e “Kultura di Enkuentro” di Papa Fransisko.

Introdukshon:

Laga nos prepará nos mes pa Pasku di Nasementu ku orashon, karidat i alabansa: ku un kurason abrí ku ta permití Señor, ku ta renobá tur kos, topa ku nos... Nos ta bai na enkuentro ku Señor, pasobra Pasku no ta solamente un selebrashon temporal òf e rekuerdo di algu bunita, sino ta algu mas: nos ta kana e kaminda aki pa bai na enkuentro ku Señor. Pasku di Nasementu ta un enkuentro! I nos ta kana ku kurason kontentu, ku henter nos bida. Nos ta topa ku Hesus bibu, manera E ta; nos ta bai serka djE ku fe. No ta fásil biba ku fe.

Pasku di Nasementu ta un enkuentro di fe! Na lugá ku ta nos ku ta bai na enkuentro ku Señor, ta importante pa laga Señor bin topa ku nos. (*=Más que ser nosotros los que encontramos al Señor, es importante dejarnos encontrar por Él*). Ora nos topa ku Señor, ta nos só, nos por bisa e “doño di kas” di e enkuentro aki; pero ora nos ta laga E mes bin topa ku nos, E ta esun ku ta drenta den nos, esun ku ta renobá tur kos, renobá kurason, alma, bida, speransa, e kaminda. Nos ta riba e kaminda ku fe, pa bai na enkuentro ku Señor, i promé ku tur kos, pa laga E bin topa ku nos! (*= para dejarnos encontrar por Él*). Ta p'esei ta nesario pa nos abri nos kurason: “kurason abrí, pa E por drenta, i bisa loke E ke bisa mi. Ku no ta semper loke ami ke pa E bisa mi! E ta Señor i E lo bisa mi loke e tin pa mi, pasobra Señor no ta mira nos tur huntú, manera un multitud. No! E ta mira kada un di nos na nos wowo, pasobra amor no ta algu apstrakto, amor ta konkreto: di persona pa persona. Laga Señor bin topa ku nos ta esaki: laga Señor stima nos (*=dejarse amar por el Señor*).

Den e kaminda aki di preparashon pa Pasku di Nasementu, ta yuda nos algun aktitut: perseveransia den orashon, dediká mas tempu na orashon, boluntat den karidat fraterno, aserká nos un tiki mas na esnan ku tin nesidat; i alegria den e alabansa pa Señor. Orashon, karidat i alabansa, ku kurason habrí pa Señor topa ku nos. (cf. *Homilia di papa Fransisko 4-12-2017*)

16 di Desèmber: *Sirag* 48,1-4.9-10); *Sal* 80, 2.2c.3b.15-19; *Mt* 9, 1-7.

Pa boka di profeta Elias i Huan Boutista, nos ta tende di ki manera nos tin ku prepará binimentu di nos Salvador.

Kombershon pastoral i mishon permanente

Kombershon pastoral ta pidi nos tur: obispu, saserdote, religioso i laikonan pa bira un “Iglesia “en salida” (=ku ta sali), un Iglesia ku portanan abrí. Un salida ku no ta nifiká kore sin rumbo i sin sentido. Hopi biaha ta pidi nos para ketu un ratu, laga ansha un banda pa mira otro na su wowo i skucha; renunsiá na bo prioridatnan personal pa kompañá esun ku a keda kant’i kaminda. Tin biaha aktua manera e tata di e yu pèrdi ku ta laga porta di su kas abrí pa ora e yu bini bek, e por dreña sin difikultat (*Evangelii Gaudium* 46). *Kombershon pastoral* ta eksigí tambe pa tur nos strukturanan bira mas misionero, pa e trabou pastoral den tur su aspekto i instansianan bira mas habrí di tal manera ku e ta pone tur su agentenan pastoral den un aktitut konstante di salida i ta favoresé asina kontestanan positivo di esnan ku Hesus ta reuní den su nòmber” (*EG* 27).

Mishon permanente ta pidi pa kada Iglesia partikular, ku ta forma parti di Iglesia universal bou di guia di su obispu, dreña den un *kombershon mishonero*. Diósesis ta e promé suheto di evangelisashon, pasobra e ta e manifestashon konkreto di e úniko Iglesia den un lugá di mundu, i den dje “ta presente berdaderamente i ta aktua e Iglesia di Kristu, ku ta Unu, Santu, Katólíko i Apostólíko” (*ChD* 11). E ta e Iglesia ku ta enkarná den un espasio determiná, ku tin tur e medionan di salbashon ku Kristu a dun’é, pero ku tin un kara lokal. Su alegría di komuniká Hesukristu ta keda ekspresá sea den su preokupashon pa anunsi’é den e lugánan ku tin mas nesesidat, sea den un salida konstante na e “periferianan” di su mes teritorio òf na e ambientenan nobo sosio-kultural. Iglesia ta perkurá pa keda semper presente kaminda tin mester di lus i di bida di Hesus Resusitá. Pa e impulso misionero aki bira kada mes mas intenso, generoso i fruktífero, mi ta animá tambe kada Iglesia partikular pa dreña den un proseso serio di disernimentu, di purifikashon i kambio (*EG* 30).

17 di Desèmber: *Di 3 Djadumingu di Atvènt: Is* 61,1-2.10-11. *Sal Lk* 1,47-54; *ITes* 5,16-24; *Huan* 1,6-8.19-28.

Keda semper kontentu den Señor, Señor ta serka. Huan Boutista a bini pa duna testimonio di e lus.

E enkuentro ku Kristu ta trese alegría

Den e di tres djadumingu di Atvènt e Liturgia ta invitá nos na alegría: “Sea semper kontentu”, san Pablo ta bisa na e kristiannan di Tesalónika, i nos ta risibí e mensahe aki tambe for di nos papa Fransisko ku na kuminsamentu di su Ekshortashon Apostólíko “*Evangelii gaudium*” ta bisa: “E alegría di Evangelio ta yena kurason i bida di esnan ku a topa ku Hesus. Esnan ku ta laga Hesus salba nan, ta keda librá di piká, di tristesa, di soledat, di e bashí interior. Ku Hesukristu e alegría semper ta nase i bolbe nase. Mi ta invitá nos fielnan kristian na un etapa

nobo di evangelisashon marká pa e alegría aki, i indiká kamindanan ku por guia Iglesia den e añanan próksimo”(EG 1).

“E promé motibu pa evangelisá ta e amor di Hesus ku nos a risibí, e eksperensia di ta salvá dor di djE i ku ta move nos pa stim'E mas i mas. Pero, ki amor ta esun ku no ta sinti e nesesidat di papia di e persona ku e ta stima, di must'r'é, i di lag'é bira konosí? Si nos no ta sinti e deseo profundo aki di papia di dje, di komunik'é na otro, nos tin ku para ketu i pidié pa e bolbe konkistá nos” (EG 264).

Den e Evangelio di awe, Huan Boutista ta bisa: “Mei mei di boso tin Un ku boso no konosé” (Huan 1,26). E ta invitá nos pa habri nos bista i nos kurason i puntra nos mes si e rason di nos alegría ta Hesukristu, i kon nos ta rekonosé? Talbes den nos mundu tin hopi persona i hopi kos ku ta primintí di duna nos alegría i nos tin difikultat pa deskubrí ken òf kiko por duna nos e alegría ei. Ta komo si fuera Huan Boutista ta bisa nos: “Deshasí di tantu kos den kua bo a pone bo konfiansa i ku nan no a satisfasé bo; prepará e kaminda pa Señor, pa e por yega serka bo, i duna bo e felisidat berdadero!” Un enkuentro semper ta produsí frutanan positivo, di kombershon i kambio di bida. Un enkuentro ku Hesus ta duna nos alegría i un speransa nobo... nos mester traha i pidi e gracia pa realisá un ‘kultura di enkuentro’... ku ta debolbé kada persona su dignidat propio di yu di Dios”. (papa Fransisko, *Homilia* 13-9-2017)

18 di Desèmber: Yer 23,5-8; Sal 72,1-2.7-8.13.18-19; Mt 1,18-24

Mara pas i hustisia por reina! Ora José a spièrta fo' i soño, el a hasi loke e angel di Señor a mand'é

E kaminda ku Dios a prepará pa nos enkuentro ku Kristu

Un berdadero enkuentro ku Hesukristu mester ta ankrá na e fundeshi sólido di Dios- Amor. Un eksperensia di Dios komo Tata, Yu i Spiritu Santu, ku ta unidat i komunion i ku ta hasi nos superá egoismo pa nos konosé nos mes ora nos ta sirbi otro... Ta Dios, ku nos ta yamá “Tata”, ta atraé nos pa medio di su Yu, e don di amor ku a sali na enkuentro di su yunan, pa asina ta renobá nos pa forsa di Spiritu Santu. “Ora ku e momentu ku Dios a stipulá a yega, El a manda su Yu, nasé di un hende muhé” (Gal 4,4) (cf. DA 240-241).

E evenementu di Kristu ta e kuminsamentu di e hende nobo ku ta lanta den historia i ku nos ta yama “*disipel*”. Nos no ta kuminsá bira kristian pa medio di un desishon étiko òf un gran idea, sino dor di un enkuentro ku un evenementu, ku un Persona, ku ta duna nos un nifikashon nobo na e bida i huntu kuné un orientashon desisivo... Esaki ta e eksperensia di e promé disipelnan ku despues di a kontra Hesus, nan a keda fasiná i yen di asombro dilanti di e persona eksepshonal ku tabata papia ku nan, e manera ku e tabata trata nan, dunando kontesta na e hamber i set di bida ku tabata reina den nan kurason”... Tur kos a kuminsá ku un pregunta: “Kiko boso ke di mi?” i un invitashon: “Bini i boso lo mira” (Huan 1,38)... (DA 244).

Den historia di Amérika Latino i Karibe awe ta lanta e mes un pregunta yen di speransa: “Maestro, unda bo ta biba”? ku nos por tradusí ku e palabra: “unda nos ta haña bo pa kuminsá un

kaminda di kombershon, di komunian i solidaridat? Kua ta e lugá, e persona ku ta papia di bo, ku ta pone nos den komunian ku bo i ta yuda nos bira bo disipel i misioneronan? (cf. DA 245).

19 di Desèmber: *Hues* 13,2-7.24-25; *Sal* 71,3-4.5-6.15.17; *Lk* 1,5-25;
Obranan di Dios ta bira visibel solamente pa esnan ku tin fe.

E lugánan di enkuentro ku Kristu

Danki na e akshon invisibel di Spiritu Santu, e enkuentro ku Kristu ta tuma lugá den e fe ku nos a risibí i ku nos ta bib'é den Iglesia. Manera papa Benedikto a bisa: “Iglesia ta nos kas! Den Iglesia katóliko nos tin tur lo kual ta bon, tur lo kual ta motibu di seguridat i konsuelo! Esun ku ta aseptá Kristu ku ta Kaminda, Bèrdat i Bida, den su totalidat, tin garantisá pas i felisidat den e bida aki i den bida eterno” (DA 246).

Nos enkuentro ku Kristu ta tuma lugá den e **Palabra di Dios** proklamá den Iglesia, Palabra di Dios inspirá pa Spiritu Santu... ta p'esei den un temporada nobo ku Iglesia misionero ta bibando na Amérika Latino i Karibe, e invitashon i kondishon indispensabel ta pa konosé i biba profundamente e Palabra di Dios (DA 247).

Den nos Diósesis, nos ke rekordá e meta pastoral ku nos a tuma for di aña pasá den nos Plan Pastoral i ku nos ke pone den práktika durante e Aña di Hubileo, ku ta bisa: “Laga e Palabra di Dios animá i motivá tur aktividatnan pastoral i bida di parokia: enkuentronan, predikashi, katisashi, entronisashon di Beibel na skol i den kas di famia”.

Un di e manera privilegiá pa nos aserká na e Palabra di Dios ta e “*Lectio divina*” òf e lektura di Santa Skritura ku ta bira orashon. E lektura aki ta kondusí na enkuentro ku Hesus-Maestro, na e konosementu di e misterio di Hesus- e Mesias, na komunian ku Hesus – Yu di Dios, i na e testimonio di Hesus – Señor di universo. E “*lectio divina*” ta favoresé un enkuentro personal ku Hesuskristu manera a sosedé ku tantu hende den Evangelio: Nikodemo, e muhé Samaritano, Zakeo, e siegu di Jériko, e dies leproso, e dos disipel di Emaus, etc... danki na e enkuentro ku Hesus nan tur a keda iluminá i rekrea pasobra nan a habri nan mes i a eksperenshá e miserikòrdia di Dios Tata ku ta ofresé su mes pa medio di e Palabra di bèrdat i bida (DA 249).

20 di Desèmber: *Is* 7,10-14; *Sal* 23, ; *Lk* 1,26-38
“*Ata sirbidó di Señor, laga sosedé ku loke bo a bisa*”.

Enkuentro ku Hesus den Liturgia i Sakramentunan

Nos ta kontra ku Hesus den e **Selebrashon di Liturgia**. Den e momentu ku nos komo disipelnan di Hesus ta biba e Liturgia, selebrando e misterio paskual, nos ta drenta mas den e misterionan di e Reino i nos ta ekspresá na un manera sakramental e vokashon di disipel i misioneronan.

Eukaristia ta e lugá privilegiá di enkuentro di e disipel ku Hesuskristu. Den Santu Sakrifisio di Misa Hesus ta atraé nos serka djE i ta laga nos drenta den su dinamismo pa ku Dios Tata i pa ku nos próhimo. Tin un laso hopi estrecho entre e tres dimenshon di e vokashon kristian: *kere, selebrá i biba* e misterio di Hesuskristu, di tal manera ku e bida kristian ta atkirí di bèrdat e forma eukarístiko (DA 251).

Nos ta kontra ku Hesus ora nos ta *selebrá Djadumingu*, e dia di Señor resusitá, ku ta un nesesidat spiritual di kada fiel, tambe di e famia kristian, i di e komunidad parokial. Si no tin un partisipashon aktivo den e Santa Eukaristia di djadumingu, lo no tin disipel di Hesus berdadero i madurá. Tur renobashon di Iglesia ta haña su forsa y laso di union den presensia di Hesus den Santa Eukaristia. Ta importante i nesario promové e “pastoral di djadumingu” i dun'é prioridat den e programanan pastoral. (*DA 252*).

Nos ta kontra ku Hesus den *Sakramentu di Rekonsiliashon*, ku ta e lugá kaminda e pekadó ta eksperenshá na un manera hopi speshal e enkuentro ku Hesus, ku ta sinti kompashon ku nos i ta duna nos su pordon misericordioso, e ta mustra nos ku amor ta mas fuerte ku e piká ku nos a kometé; e ta libra nos di tur loke ta stroba nos di keda den su amor, i e ta debolbé e alegria i entusiasmo di anunsí'e na otronan ku kurason generoso. (*DA 254*).

Ademas nos tin enkuentro ku Kristu den e komunidad ku ta reuní den su nòmber; Kristu ta presente den su ministernan; ta presente den esnan ku ta lucha pa hustisia, pas, bienestar komun, ta presente den e pobernan, den enfermonan i den esnan ku ta sufri pa kousa di Evangelio...

21 di Desèmber: *Sof 3,14- 18; Sal 33, 1-3; Lk 1,39-45*

Bishita di Maria na Elisabèt ta fuente di legria, ta un sirbishi i un bendishon

Enkuentro ku otro

Den e bishita di la Bírgen Maria na Elisabèt, nos ta rekonosé dos signo ku ta manifestá si nos ta kristian di bèrdat: e “sirbishi” i “bai na enkuentro ku otro”. Sirbishi i enkuentro ta pidi nos sali for di nos mes; sali pa sirbi i sali pa kontra, pa kumindá i brasa otro. Ku e sirbishi aki di Maria i ku su enkuentro ku Elisabèt, e promesa di Señor ta keda renobá: “Señor bo Dios ta meimei di boso”. Señor ta presente ora nos ta sirbi, Señor ta presente den enkuentro.

E di dos aspekto di e bishita di Maria na Elisabèt ta e legria ku nan dos ta sinti pasobra nan a haña e bendishon di trese un yu na mundu! Nan a aseptá ku fe i kurashi Dios su boluntat den sirkunstansianan ekstraordinario. Riba esaki papa Fransisko ta bisa ku “tin hopi hende muhé yen di kurashi den Iglesia: nan ta manera la Bírgen Maria; hende muhé ku ta karga e responsabilidat di un famia, den edukashon di e yunan, nan ta kapas di enfrentá tur sorto di atversidat i doló, hende muhé ku ta kuida i kura enfermonan. Den nan nos ta rekonosé e “signo kristian” di e sirbishi. Un sirbishi ku alegria! Ta un legria ku di tur manera ta pidi sakrifisio i mortifikashon ku ta nifiká di renunsiá di hasi solamente loke nos ta gusta hasi!

E di tres aspekto di e enkuentro di Maria na Elisabèt, papa Fransisko ta referí na e fe: “Ora un hende ta bisa ku ta kristian-katóliko, ora e ta pensa ku “kere” ta solamente profesá ‘kredo’ òf pertenesé na un religion, talbes e tin un vishon pover di e palabra fe. Pasobra ora bo ta kere di bèrdat, bo ta kuminsá sinti un deseo grandi di saboriá e delisianan ku Dios ta regalá na e almanan ku ta busk'é ku sinseridat. E pedagogia di Dios ta asina sabí ku e sa pusha nos i duna nos e sabor di su felisidat ora nos ta fiel na dje. Ta un legria ku ta hiba nos i ta invitá nos na un entrega mas generoso pa realisá un plan ku ta surpasá nos vishon humano. Elisabèt ta rekonosé ku Maria ta

trese un felisidat asina grandi pasobra el a kere, i ademas pasobra su bida ya no ta respondé na un plan ku el a traha, ma ta e plan ku Señor a traha p'e! (*Homilía* di Papa Fransisko 31-5-2016).

22 di Desèmber: *ISam* 1,24-28; *Sal ISam* 2,1.4-8; *Lk* 1,46-56

Mi alma ta alabá Señor... mi kurason ta legra den Dios mi Salvador!

Enkuentro di e mama ku su beibi

E evangelio di San Lukas ta konta nos di e anunsio di e angel Gabriel na Maria na un manera hopi diskreto, riba punta di pia, ku sumo rèspèt pa e protagonista di e diálogo ku a tuma lugá. Pero awe sinembargo, nos ta asistí na un “di dos Anunsiashon”. Esun ku Spiritu Santu a revelá na Elisabèt na e momentu ku el a rekonosé ku Maria ta e ‘Mama di su Señor’. E dos futuro mama aki ta biba i ta kompartí e sekreto mas grandi ku Dios por a komuniká na hende, i nan ta hasié ku un naturalidat impreshonante. Di su banda, Maria, e ‘yen di grasía’, no solamente no ta keda osioso den su kas, (bira Mama di Dios no ta oponé ni un tiki di su kondishon di mucha muhé humilde), di tal manera ku e ta bai yuda Elisabèt su famia. I Elisabèt di su banda, ta anunsiá, inspirá pa Spiritu Santu, un gran bèrdat: ku e felisidat ta den e konfiansa den Señor: Felis esun ku a kere

E enkuentro aki ta muestra nos na promé lugá e komunikashon ku ta tuma lugá manera un diálogo di dos kurpa. E promé kontesta na e kumindamentu di Maria ta wòrdu duná pa e yu ku a bula di legria den barika di Elisabèt. Bula di legria ta e signo di tur otro komunikashon ku nos ta siña promé ku nos ta bini na mundu. E seno materno ku ta akohé nos ta e promé “skol” di komunikashon, dor di skucha i di tuma kontakto di e kurpa, kaminda nos ta kuminsá kustumá ku e mundu eksterior den un ambiente di protekshon i ku e sonido di e kurason di e mama ku ta bati i ta duna trankilidat. E enkuentro aki di dos ser asina íntimo, maske ainda nan ta keda straño un na otro, ta un enkuentro yen di promesanan, ta nos promé eksperensia di komunikashon. Ta un eksperensia komun na nos tur, pasobra nos tur a nase di un mama. Despues di a yega na mundu, nos ta permanesé den un “seno” ku ta e famia. Un seno formá pa diferente persona ku ta relashoná ku otro. Famia ta e lugá kaminda nos ta siña biba huntu i kompartí e diferensianan. Diferensia di género i di generashonnan, ku ta komuniká i ku ta akohé mutuamente, pasobra entre nan ta eksistí un vínkulo. I ora e posibilidat di relashon ta mas grandi i mas diferente ta edat di hende, e ambiente di bida lo bira ainda mas riku (*Meditashon* di Papa Fransisko).

23 di Desèmber: *Mal* 3,1-4,23-24; *Sal* 25,4-8.10; *Lk* 1,57-66

“Su nòmber mester ta Huan... Kiko lo ta destino di e yu aki”?

E lo trese pas entre tatanan i yunan, pa Mi no bin i afligí e tera ku maldishon (Mal 3, 24)

Kiko ta trese komo novedat ora nos ta utilisá e ekspreshon “kultura di enkuentro”? No ta meskos pa nos bisa “pas sosial”? No, pasobra e palabra “kultura” ta nifiká algu ku a drenta den e mentalidat di e pueblo. Si nos papia di un kultura determiná den e pueblo, anto esei ta mas ku un idea òf algu trahá segun konvivensia. Ora e ta bira kultura, el a kombertí su mes den un “pashon” ku tur hende ta kompartí ku entusiasmo i despues e ta bira un estilo di bida. Ta nifiká ku komo pueblo, nos ta sinti e pashon pa e meta di topa ku otro, di buska puntonan di kontakto, di konstruí

brùgnan, di proyektá algu ku ta inkluí tur hende. E pueblo ku ta e suheto di e kultura aki, no un grupo so ku ta buska pasifikashon ku medionan profeshonal. E logro di e pas aki ta eksigí hopi trabou, e ta kostoso, pasobra e kos mas fásil ta kontrolá òf tapa e libertat i e diferensianan ku un tiki astusia i algun rekursu. Pero e pas ei lo e keda algu superfisial i frágil. E integrashon ta hopi mas difísil i e ta bai poko poko, pero e ta e garantia di un pas real i sólido. Mi ta puntra: Bo ta logra esei ora bo uni solamente hende bon, santu i puru? Sigur ku no! Laga nos paga tinu na loke papa Fransisko ta bisa: “Tambe e personanan ku por keda kuestioná riba nan erornan, tin algu pa aportá i ku no mester lag’é bai pèrdí (EG 236). Si nos pretendé eliminá algun, ta meskos ku ninga parti di e realidat, na final e lo ta un éksito parsial!

Tampoko ta sirbi un pas ku a ser lográ pa medio di e silencio di esnan ku ta reklamá algu òf evitá ku nan por tin bos públiko. Papa Fransisko ta sigui bisa ku no ta trata di un konsenso riba mesa òf un pas temporal pa un minoria felis. (EG 218). Ta trata anto di generá *prosesonan di enkuentro*, prosesonan ku ta konstruí un pueblo ku ta engrandesé su mes pa medio di e diferensianan (...) Ta nesario promové prosesonan di integrashon ku esnan ku a keda deskartá, lubidá, esnan ku no ta visibel pasobra nan no ta den e lugánan kaminda nos ta move, i ta p’esei nos no ta toka nan humanidat heridá. Maske nos ta hasi tur posibel pa no mira nan ni toka nan, nan tambe ta parti di e sosiedat, nan tin derecho di biba ku dignidat i di ta integrá den e komunidad (Victor M. Fernández, *Pensamentu di papa Fransisko*).

24 di Desèmber: *Di 4 Djadumingu di Atvènt: 2 Sam 7,1-16; Sal 89,2-5.27-29; Rom 16,25-27; Lk 1, 26-38. Dios ta amor. El a revelá nos su amor mas tantu ora ku su Yu a bira hende*

Legra-bo, yen di grasía! (Lk 1,28)

E saludo di Angel Gabriel ta revelá e nòmber nobo ku Maria ta haña: “yen di grasía”, nos tambe ta yamé asina ora nos ta resa ‘Ave Maria’. Kiko ta nifiká “yen di grasía”? Maria ta yen di e presensia di Dios. Dios a bin biba den dje, den dje no tin lugá pa piká. Esaki ta un realidat ekstraordinario, pasobra tur hende, pa desgrasia, a keda kontaminá pa malu. Kada un di nos, ora nos mira nos mes paden, ta haña algun skuridat, algun sombra. E santunan mas grandi tambe tabata pekadó, i tur e realidatnan di mundu, hasta esnan mas bunita, ta afektá pa malu: nan tur, ménos Maria! E ta e úniko “oásis semper bèrdè” di humanidat, e úniko ku no a keda kontaminá, pa e por aseptá ku su ‘sí’ Dios ku tabata bini na mundu i kuminsá asina un historia nobo. Kada bes ku nos kumindá Maria “yen di grasía”, nos ta dirigí na dje e alabansa mas grandi, mes kos ku Dios a hasi ku né. Asina nos ta rekonosé ku e ta semper hóben, nunca a bira bieu dor di e piká. Tin un kos ku ta pone hende bira bieu, bira bieu paden, no ta su edat, sino e piká.

Iglesia ta kanta “tota pulchra”, bo ta tur bunita, o Maria! Manera su hubentut no ta dependé di su edat, tampoko su bunitesa ta konsistí den su aspekto eksterior. Maria, manera Evangelio ta present’é awe, no ta sobresalí pa su aparensia: e ta bini di un famia simpel, e tabata biba humildemente na Nazareth. E no tabatin un bida fásil i kómodo tampoko, el a sinti temor i el a bira tur aribabou, ora el a tende e anunsio di e angel. Sinembargo el a biba un bida di grasía ku a

yené ku legria i bunitesa. Den hopi imáhen ku pintornan a representá e Anunsiashon, nan ta mustra Maria sintá dilanti di e angel ku un buki chikitu den su man. E buki ta e Skritura, asina Maria tabata skucha Dios i papia kun'E. E Palabra di Dios tabata su sekreto: e tabata promé den su kurason, despues el a bira karni den su seno...

Laga nos kontemplá awe Maria “yen di grasia”. Laga nos pidi su yudansa pa nos tambe keda hóben, miéntras nos ta bisa ‘no’ na e piká i bisa ‘si’ na Dios. (*Orashon di Angelus*, 8-12-2017).

24 di Desèmber (mei anochi) *Is* 9,1-6; *Sal* 96, 1-3.11-13a; *Lk* 2,7-14

Mi ta anunsiá boso un gran legria! Awe un Salbador a nase pa nos. E ta Kristu Hesus. Aleluya.

Hesus ta bini na nos enkuentro

Awe nochi nos kurason ta yena ku admirashon i gradisimentu: Dios a bira hende; Dios ta bin biba serka nos pa mustra nos su ternura. E misterio di Pasku di Nasementu ta yena di legria e kurasonnan di hende sensio, pasobra ta rekordá ku Dios a baha te na nos. El a bini pa kompartí nos suerte i kompañá nos den e kaminda di nos bida. Ta e manifestashon di e amor ku e tin pa nos. Shelu ta aserká tera: e angelnan mes kier a baha pa kompañá Dios ora el a bini na mundu. E wardadónan a keda asombrá pa e anunsio di e angel: “Boso lo topa ku un yu lorá den paña, drumí den un pesebre” (*Lk* 2, 12). Ki nifikashon por tin e palabranan aki i e purá ku e wardadónan a lanta pa bai na e enkuentro di e yu ku a nase den e siudat di David? Ku Dios no ta bini ku eksigensianan pa topa ku hende. Ku no ta un kasualidat ku e ta nase den un stal. E no a bini pa pidi, ma pa duna.

Señor ta manifestá den pobresa ekstremo pasobra e no ke konfundí nos ku su grandesa, sino atraé nos ku su amor. E ta bini pa mustra ku nos no a keda bandoná pa nos kuenta i ku nos no tin ku tene miedu, e ta Emmanuel, Dios ku nos! San Pablo ta spièrta nos pa “renunsiá un bida sin Dios” (*Tito* 2,11) ku otro palabra ku nos no por biba sin Dios i ku no ta posibel ku nos por alkansá Dios si E no ta bini serka nos i ta bati na porta di nos kurason. Nos fe no ta un konkista, sino un aseptashon. E ta bin pa ofresé nos e felisidat ku nos ta anhelá, i ku e amor ku nos tabata buska ta den djE i nos ta hañé por nada! (for di D. A. Fernández, *Magnificat*).

Rumannan, e misterio di Enkarnashon ta yena nos ku speransa, e ta inkluí tur e realidatnan di humano pa yama nan na salbashon. Heskristu ta kapas di komprendé tur nos sufrimentu i kana ku nos den e kaminda di bida... Den e nasementu di Hesus no tin nada humano ku a keda straño na Dios. El a asumí kompletamente nos historia i nos realidat (cfr. *Gaudium et Spes* 22).

25 di Desèmber: *Pasku di Nasementu: Is 52,7-10; Sal 98,1-4; Heb 1,1-6; Huan 1,1-18*
E Palabra a bira hende i a bin biba serka nos (Huan 1,14).

E abraso misericordioso di Dios

Kaminda Dios ta nase, einan speransa ta nase, kaminda speransa ta nase, hende ta haña dignidat. Sinembargo, ainda tin hopi hende hòmber i muhé ku a keda privá di nan dignidat humano i, manera e Niño Hesus, ta sufri friu, pobresa i rechaso di hende. Mara Señor, riba e dia aki di su binimentu na mundu, konsolá tantu hende ku ta hui for di miseria i guera, i bolbe duna speransa na tur esnan ku no tin trabou. Ku Señor drama hopi bendishon riba tur esnan ku ta traha ku generosidat pa akohé e kantidat grandi di migrante i refugiadonan, i ku ta yuda nan konstruí un futuro digno pa nan mes i pa nan sernan kerí, i pa nan keda integrá den e komunitatnan ku a risibí nan.

Kaminda Dios ta nase, misericòrdia ta floresé. Esaki ta e don mas presioso ku Dios ta ofresé nos. Nos, komo kristian, ta yamá pa deskubrí e ternura ku nos Tata selestial tin pa kada un di nos. Mara Señor konsedé, na un manera partikular, na esnan ku ta será den prison, e eksperensia di un amor misericordioso ku ta kura heridanan i ta vense malu. Di e manera aki, awe tur huntu nos lo gosa den e dia di nos salbashon!

Kontemplando e Pesebre, laga nos fiha nos bista riba e brasanan abrí di e Niño Hesus, ku ta mostra nos e abraso misericordioso di Dios, miéntras nos ta skucha su bos ku ta bisa: “Pa motibu di mi rumannan i mi amigunan lo mi bisa awor: "Ku pas lo reina den bo." (Sal 122,8) (*Mensahe di papa Fransisko 25-12-2016*).